



Inuit Ataqatigiit Inatsisartuni

Nuuk, 17. december 2007

Inatsisartut suleriaasianni § 36 imm 1 naapertorlugu apeqqutit imaattut Naalakkersuisunut matu-
muuna saqqummiuppakka
(Inatsisartunut ilaasortaqa Asii Chemnitz Narup, Inuit Ataqatigiit)

**Apeqqutit tamarmik Dronning Ingridip Napparsimavissuani A1-imi uninngasunut aammalu
tassani sulisunut tunngassuteqarput ukioq 2006-imi aammalu ulloq manna tikillugu ukioq
2007-imi pisunut tunngassuteqarlutik:**

Ukioq 2006-imi uninngasut qassiuppat? Ukioq 2007-imi qassit?

Inuit qassit ukioq 2006-imi qitequtserlugit siniffimmut aalajangersugaappat?
Qassillu ukioq 2007-imi taamatut pineqarpat?

Qasseriarluni napparsimasunik qitsequtsiilluni siniffimmut aalajangersaasoqarpa – ukioq 2006-imi
aammalu ukioq 2007-imi?

Qitsequtsiilluni siniffimmut aalajangersaanerit ulloq unnuarlu ataaseq sinnerlugu sivismuseqartut
qassiuppat? Ullut unnuillu marluk sinnerlugit sivismuseqartut qassiuppat? Sapaatip akunnera sinner-
lugu qassiuppat?

Qitsequtsiilluni siniffimmut aalajangersuineq sivismunerpaq ullut qassit sivismuseqarpa?

Napparsimasut ataasiakkaarlutik qasseriarlutik qitequtserlugit siniffimmut aalajangersugaappat?

Napparsimasut ataasiakkaat qassit taamatut pineqarpat?

Napparsimasoq qitsequtserlugu siniffimmut aalajangersugaq qanoq nakkutigineqartarpa?

Qimanneqanngivillutik /isersimasoqaannavillutik alarneqaratillu nakkutigineqartarsimappat?

Napparsimasut taamatut pineqareersimatillutik pineqarsimanerminnik maalaaruteqarsinnaanermut
pisinnaatitaaffitsik pillugu qanoq paasissutissineqartarpat?

Maalaaruteqarsinnaanermut paasissutissiinissamut suleriiaatsit pillugit najoqqutassat suuppat?

Napparsimasut qassit pinngitsaalineqarlutik aalajangersorneqarsimanertik pillugu maalaaruteqar-
pat?

Immikkoortortamut A1-mut matu isertarfik paarnaarneqartasimasoq tusarliunneqarpoq:

Qasseriarluni tamanna pisimava?

Taamatut pisoqartillugu napparsimasut ataasiakkaat ilisimatinneqartarsimappat?

Taamatut pisoqartillugu napparsimasut tamarmik ilisimatinneqartarsimappat?

Peqqinnissakkut Nakkutilliisoqarfimmut nalunaarusiortarnerit

Peqqinnissakkut Nakkutilliisoqarfimmut tunngavilersukkanik nalunaarusiortoqartarpa – napparsimasunik qitsequtsiilluni siniffimmut aalajangersuisoqarsimagaangat aammalu matu parnaarneqarsimagaangat?

Taamaaliortoqartarpat – nalunaarusiat qanoq imaqarpat tunngavilersuutit ilanngullugit?

Taamaaliortoqartarsimanngippat – soormita?

Nakuusernerit

Nakuusernerit qassiuppat – uninngaqatinut sulisunullu?

Suut taamaattoqarneranut pissutaappat?

Napparsimasut sulisullu tungaannut isumannaallisaaneq qanoq Naalakkersuisut nalilerpaat?

Sulisoqarnermut tunngasut

Atorfiit qassiuppat?

Taakkunangga qassit aalajangersimasumik atorfeqartitsinikkut inuttaqartinneqarpat?

Paarlatsit qassit – isumaqatigiisummik tunngaveqarlutik sulisuuppat?

Paarlatsit qassit – vikarbureau-t aqcutigalugit sulisuuppat?

Sulisut napparsimallutik sulinnittarnerat qanoq annertutigaa?

Qarasaasiaq atorlugu paasissutissanik katersineq

Qaqugu qarasaasiaq atorlugu paasissutissanik kisitsisinillu nalunaarsuisoqartalissava – taamaaliornikkut napparsimasut amerlassusaat, nappaataat, pinngitsaaliisarnerit, napparsimasut sumi najugaqarnerat, ikiorsiissutitut neqeroorutit il.il. pillugit ineriartornerit allanngornerillu malit-tarineqarsinnaanngorlugit?

Ataatsimut naliliineq

Eqqarsartaatsimikkut nappaatillit sulisullu A1-mi atugaat ataatsimut isigalugit Naalakkersuisut qanoq naliliippaat?

Inatsit

Eqqarsartaatsikkut napparsimasut pillugit inatsisissatut siunnersuut qaqugu Naalakkersuisut Inatsisartunut saqqummiutissavaat?

Tunngavilersuutit

Ilisimaneqartutut apeqquteqaateqarnera aallaavigalugu eqqarsartaatsimikkut nappaatillit atugaat taakkunangalu kiffartuussineq Inatsisartuni ukiaq manna oqallittussaagaluarpugut. Inatsisartut upernaamut ataatsimiinnissatsinnut oqaluserisassaq kinguartissasoq uanga nammineerlunga kis-saateqarnikuuvunga – oqallinnermut pimoorussamik periarfissat pitsaanoqqullugit. A1-imili pis-sutsit qassiit pillugit saaffigineqartarama apuunneqarmata taakkulu asuliinnaanngitsutut nalilern-eqartariaqarsorigakkit, kiisalu upernaamut Inatsisartuni oqallinnissatsinnut utaqqissunneqassa-galuarpata akisussaassuqanngitsuliornerussammat matumuuna apeqqutit nassiuppakka.